

四庫全書

集部

欽定四庫全書

御定佩文齋詠物詩選卷八十七

曲江類

五言古

同諸公秋霽曲江俯見南山

唐 儲光羲

天靜終南高俯映江水明有若蓬萊下  
淺深見澄瀛羣峰懸中流石壁如瑤瓊  
魚龍隱蒼翠鳥獸遊清泠菰蒲林下秋  
薜荔波中輕山靈浴蘭沚水若居雲屏  
嵐氣浮

渚宮孤光隨曜靈陰陰豫章館宛宛百花亭大君及羣  
臣宴樂方嚶鳴吾黨二三子蕭辰怡性情逍遙滄海時  
乃在長安城

曲江春霽

唐 劉 駕

宿雨洗秦樹舊花如新開池邊艸未乾日照人馬來馬  
蹄踏流水漸漸成塵埃鴛鴦不敢下飛遶岸東西此地  
喧仍舊歸人亦滿街

七言古

和錢員外答盧員外早春獨遊曲江見寄長句

唐  
白居易

春來有色閭融先到詩情酒思中  
柳岍霏微裊塵雨  
杏園淡蕩開花風  
聞君獨遊心鬱鬱  
薄晚新晴騎馬出  
醉思詩侶有同年  
春歎翰林無暇日  
雲夫首唱寒玉音  
蔚章繼和春搜吟  
此時我亦閉門坐  
一日風流三處心

五言律

奉和聖製賜史供奉曲江宴應制

唐  
王維

侍從有鄒枚瓊筵向水開  
言陪柏梁宴新下建章來對  
酒山河滿移舟草樹迴  
天文同麗日駐景惜行杯

酬白二十二舍人早春曲江見寄

唐  
張籍

曲江水欲盡風日已恬  
和柳色看猶淺泉聲覺漸多  
紫蒲生濕岸青鴨戲晴波  
仙掖高情客相招共一過

曲江

唐  
鄭谷

細草岬西東酒旗搖水風樓臺在煙杪鷗鷺下沙中翠  
幄晴相接芳洲夜暫空何人賞秋景興與此時同

曲江作

唐  
韋莊

細雨曲池濱青袍草色新詠詩行信馬載酒喜逢人性  
為無機率家因守道貧若無詩自遣誰奈寂寥春

曲江暮春雪霽

唐  
曹松

霽動江池色春殘一去遊菰風生馬足槐雪滴人頭北  
關塵未起南山清欲流如何多別地却得醉汀洲

秋日曲江書事

唐李洞

門搖枯葦影落日共鷗歸園近鹿來熟江寒人到稀  
片雲穿塔過枯葉入城飛翻怕賓鴻至無才動禮闈

曲江秋望

金師拓

山遠嶂重出野平天四圍涼風芟實圻久雨藕花肥  
水闊漁舟小天長去鳥微紫蒲行處有采采莫盈衣

五言排律

早春獨遊曲江

唐白居易

散職無羈束羸駮少送迎朝從直城出春傍曲江行風  
起池東暖雲開山北晴冰銷泉脈動雪盡草芽生露杏  
紅初拆煙楊綠未成影遲新度鴈聲澀欲啼鶯間地心  
俱靜韶光眼共明酒狂憐性逸藥效喜身輕慵慢疎人  
事幽棲遂野情迴看雲閣笑不似有浮名

七言律

曲江

唐  
杜甫

城上春雲覆苑牆江亭晚色靜年芳林花著雨燕支濕

水荇牽風翠帶長  
龍武新軍深駐輦  
芙蓉別殿謾焚香  
何時詔此金錢會  
暫醉佳人錦瑟傍

及第後宴曲江

唐劉滄

及第新春選勝遊  
杏園初宴曲江頭  
紫毫粉壁題仙籍  
柳色簫聲拂御樓  
霽景露光明遠岸  
晚空山翠墜芳洲  
歸時不省花間醉  
綺陌香車似水流

曲江

唐章碣

日照香塵逐馬蹄  
風吹浪濺幾迴隄  
無窮羅綺填花徑

大半笙歌占麥畦  
落絮却籠他樹白  
嬌鶯更學別禽啼  
祇緣頻宴蓬洲客  
引得遊人去似迷

曲江

唐  
李山甫

南山低對紫雲樓  
翠影紅陰瑞氣浮  
一種是春長富貴  
大都為水也風流  
爭攀柳帶千千手  
閒插花枝萬萬頭  
獨向江邊寂寞悵  
滿衣塵土避王侯

曲江春望

唐  
羅鄴

故國東歸澤國遙  
曲江晴望憶漁樵  
都緣北闕春先到

不是南山雪易消，瑞景玉樓開組繡。  
歡聲丹禁奏雲韶，雖然未得陪鸚鵡。  
亦酌金觴祝帝堯。

七言絕句

曲江春望

唐盧綸

菖蒲翻葉柳交枝，暗上蓮舟鳥不知。  
更到無花寂深處，玉樓金殿影參差。

其二

翠黛紅粧畫鷁中，共驚雲色帶微風。  
簫管曲長吹未盡。

花南水北雨濛濛

其三

泉聲徧野入芳洲  
擁沫吹花上碧流  
二月行人漸無路  
巢峰乳燕滿高樓

同張水部籍春遊曲江寄白二十二舍人

唐韓愈

漠漠輕陰晚自開  
青春白日映樓臺  
曲江水滿花千樹  
有底忙時不肯來

酬韓侍郎張博士雨後曲江見寄

唐白居易

小園新種紅櫻樹  
閒遶花行便當遊  
何必更隨鞍馬隊  
衝泥蹋雨曲江頭

曲江獨行

白居易

獨來獨去何人識  
厖馬朝衣野客心  
閒愛無風水邊坐  
楊花不動樹陰陰

曲江池上

唐雍裕之

殷勤春在曲江頭  
全藉羣仙占勝遊  
何必三山待鸞鶴  
年年此地是瀛州

春遊

唐  
王涯

曲江綠柳變煙條  
寒谷冰隨煖氣消  
纔見春光生綺陌  
已聞清樂動雲韶

春日遊曲江

唐  
張喬

日暖鴛鴦拍浪春  
蒹葭浦際聚青蘋  
若論來往鄉心切  
須是煙波島上人

曲江春草

唐鄭谷

花落江隄簇曉煙  
雨餘江色遠相連  
香輪莫輟青青破  
留與遊人一醉眠

御定佩文齋詠物詩選卷八十七

欽定四庫全書

御定佩文齋詠物詩選卷八十八

淮水類

五言古

奉和出潁至淮應令

隋 諸葛潁

涉潁倦紆迴浮淮欣迴直遙村含水氣遠浦澄天色靈  
濤稍欲近仙巖行可識元覽屬睿辭風雲有餘力

奉和出潁至淮應令

隋 蔡允恭

久倦川涂曲忽此望淮折波長泛淼淼眺迴情依依稍  
覺金烏轉漸見錦颿稀欲知仁化洽謳歌滿路歸

奉和出潁至淮應令

隋 弘執恭

睿情欣逸賞臨泛入淮淝棹歌喧岸度颿影出雲飛清  
流含日彩犇浪蕩霞暉還如漳水曲鳴笳啓路歸

奉和出潁至淮應令

唐 虞世南

良晨喜利涉解纜入淮潯寒流泛鷁首霜吹響清吟潛  
鱗波裏躍水鳥浪前沈邗溝非復遠悵望悅宸襟

渡淮

宋 劉子翬

鳴輦渡長淮，霏煙散清晨。  
皎皎初日光，照耀草木新。  
橫林度餘碧，壘嶂開嶙峋。  
移橈失向背，煙波浩無垠。  
兒童發櫂歌，余心亦欣欣。  
輕帆互相踰，畫鷁映流津。  
徘徊望洲渚，悠然獨懷人。  
樵漁有棲遯，寂寞誰問鄰。  
暮風翻洪濤，魚蝦亦有神。  
四顧天地黑，孤舟恐漂淪。

五言律

淮上秋夜

唐 劉方平

旅夢何時盡  
征途望每賒  
晚秋淮水上  
新月楚人家  
猿嘯空山近  
鴻飛極浦斜  
明朝南岸去  
定折桂枝花

五言排律

和杜學士旅次淮口阻風

唐李嶠

夕吹生寒浦  
清淮上暝潮  
迎風欲舉棹  
觸浪反停橈  
淼漫煙波闊  
參差林岫遙  
日沈丹氣斂  
天敞白雲消  
水鴈銜蘆葉  
沙鳧隱荻苗  
客行殊未已  
川路幾迢迢

五言絕句

問淮水

唐  
白居易

自嗟名利客擾擾在人間  
何事長淮水東流亦不閒

望淮

元  
王暉

朝日慘無色昏昏水氣間  
到淮猶數里隔岸見尖山

七言絕句

渡淮

唐  
武元衡

暮濤凝雪長淮水  
細雨飛梅五月天  
行子不須愁夜泊  
綠楊多處有人煙

渡淮即事

元 薩都拉

揚花點點衝帆過  
燕子雙雙掠水飛  
淮上漁人閒不得  
船頭對結綠蓑衣

御定佩文齋詠物詩選卷八十八

欽定四庫全書

御定佩文齋詠物詩選卷八十九

河類

四言古

河銘

漢  
李尤

洋洋河水赴宗于海經自中州龍圖所在昔周諸侯會  
於孟津魚入王舟乃往尅殷大漢承緒懷附遐鄰邦事  
來濟各貢厥珍

河清頌

宋張暢

渾渾洪河家國之濱襟帶晉衛領袖齊秦龍門誕溜積  
石傳津乘運能有經啓天人化流上帝時表初星飛書  
曝瑞龍圖照神協靈既偉通氣載榮

五言古

奉和濟黃河應教

北齊蕭愨

大蕃連帝室驂駕奉皇猷未明驅羽騎凌晨方畫舟津  
城度維錦岸柳夾緹油鐘聲揚別島旗影照滄流早光

生劍服朝風起節樓滔滔細波動喬喬輕舫浮回橈避  
近磧放舫下前洲全疑上天漢不異謁蓬丘望知雲氣  
合聽識水聲秋從君何等樂喜從神仙遊

夜到洛口入黃河

唐 儲光羲

河洲多青草朝暮增客愁客愁惜朝暮枉渚暫停舟中  
宵大川靜解纜逐歸流浦淑既清曠汭洄非阻脩登艫  
望落月擊汰悲新秋倘遇乘槎客永言星漢遊

同敬八盧五汎河間清河

唐 高適

清川在城下沿汎多所宜同濟愜數公翫物欣良時飄  
飄波上興燕婉舟中詞昔涉乃平原今來忽漣漪東流  
達滄海西流延滄池雲樹共晦明井邑相逶迤稍隨歸  
月帆若與沙鷗期漁父更留我前潭水未滋

黃河

宋 梅堯臣

積石導淵源沄沄瀉崑閭龍門自吞險鯨海終涵量怒  
洑生萬渦驚流非一狀淺深殊可測激射無時壯常苦  
事隄防何曾息波浪川氣迷遠山沙痕落秋漲槎沫夜

浮光舟人朝發唱洪望畫鷁連古戍蒼崖向浴鳥不知  
清夕陽空在梁誰當大雪天走馬堅冰上

七言古

河復

宋蘇軾

君不見西漢元光元封間河決瓠子二十年鉅野東傾  
淮泗滿楚人恣食黃河鱸萬里沙回封禪罷初遣越巫  
沈白馬河工未許人力窮薪芻萬計隨流下吾君仁聖  
如帝堯百神受職河神驕帝遣風師下約束北流夜起

澶州橋東風吹凍收微淥神功不用淇園竹楚人種麥  
滿河淤仰看浮槎棲古木

五言律

河流

唐徐夔

洪流盤砥柱淮濟不同波莫訝清時少都緣曲處多  
遠能通玉塞高復接銀河大禹成門嶮為龍始得過

清河

元貢奎

谿碧石生處山青雲起時鶉花紅映岸藤蔓翠牽籬落

日漁家網微風酒市旗順流船漸急翻覺去心遲

清河水漲答復中吉監縣水字詩

元張翥

潁泆清河漲湍流滋浸淫滄溟渾灌注濁浪浩浮沈  
洲渚津涯濶泥沙沮如深沿淮澤鴻滿漂蕩渡江尋

潞河晚泊

明屠隆

迴浦落帆盡長堤帶郭斜暮煙平吐樹春雨薄沈沙白  
艇藏漁市黃茅覆酒家一瓢雲水外不復問年華

夏日遊通惠河

明徐階

頗憶三江遠乘流意若何水深秋氣入竹密雨聲多  
熟果當尊落驚禽拂棹過柳陰催繫纜敲枕聽漁歌

五言排律

黃河

唐太宗

何處發崑崙崙連乾復浸坤波渾經雁塞聲振自龍門  
岸裂新衝勢灘餘舊落痕橫溝通海上遠色盡山根勇  
逗山峰折雄標四瀆尊灣中秋景樹闊外夕陽邛沫亂  
知

魚响槎來見鳥蹲飛沙當白日凝露接黃昏潤可資農  
畝清能表帝恩雨吟堪極目風渡想驚魂顯瑞龜曾出  
陰靈伯固存盤渦寒漸急淺瀨暑微溫九曲終柔勝常  
流可暗吞人間無博望誰復到窮源

送襄陽盧判官奏開河事

唐錢起

千里趨魏闕一言簡聖聰河流引闕外國用贍秦中有  
詔許其策隨山興此功連雲積石阻計日安波通飛棹  
轉年穀利人勝歲豐言歸漢陽路拜首蓬萊宮紫殿賜

衣出青門酣酌同晚陽  
過微雨秋水見新鴻  
坐惜去車遠愁者離館空  
因思郢川守南楚滿清風

七言律

自鞏雒舟行入黃河  
即事寄府縣僚友

唐  
韋應物

綠水蒼山路向東  
東南山豁大河通  
寒樹依微遠天外  
夕陽明滅亂流中  
孤邛幾歲臨伊岸  
一鴈初晴下朔風  
為報雒橋遊宦侶  
扁舟不繫與心同

黃河

唐羅隱

莫把阿膠向此傾，此中天意固難明。  
解通銀漢應須曲，纔出崑崙便不清。  
高祖誓功衣帶小，仙人占斗客槎輕。  
三千年後知誰在，何必勞君報太平。

次韻陳子仁黃河

元楊載

禹功疏鑿過憂勤，海內山川自此分。  
元氣渾淪通地脈，孤光迢遞貫天文。  
金伏磔秋逾盛，陰火藏淵夜不焚。  
多少魚龍爭變化，總歸西北會風雲。

登徐州城上黃樓北望河流作

元 柳貫

高樓背水壓奔衝影動雲虹落水中土色從黃宜制勝  
河聲觸險聽分洪却思沈璧千年日欲問乘槎八月風  
汴泗交流平似席南行北播本同功

到廣黃河

元 蔡珪

清漳節物似清江不復尊鱸夢故鄉歷下果能留太白  
鏡湖端是屬知章身隨客路常岑寂心與沙鷗共渺茫

尚困馬蹄三百里小舟聊與過滄浪

御定佩文齋詠物詩選卷八十九

欽定四庫全書

御定佩文齋詠物詩選卷九十

漢水類

五言古

玩漢水

梁簡文帝

雜色崑崙水泓澄隴首渠豈若茲川麗清流疾且徐  
離細磧淨藹藹樹陰疎石衣隨溜卷水芝扶浪舒連翩  
瀉去檝鏡澈倒遙墟聊持點纓上於是察川魚

初春漢水漾舟

唐 孟浩然

漾舟逗何處，神女漢臯曲。  
雪消冰復開，春潭千丈綠。  
輕舟恣往來，探翫無厭足。  
波影搖妓釵，沙光逐人目。  
傾杯魚鳥醉，聯句鶯花續。  
良會難再逢，日入須秉燭。

五言律

與鮮于庶子泛漢江

唐 岑 參

急管更須吹，杯行莫遣遲。  
酒光紅琥珀，江色碧琉璃。  
日影浮歸棹，蘆花罨釣絲。  
山公醉不醉，問取葛疆知。

漢江臨汎

唐王維

楚塞三湘接荆門九派通江流天地外山色有無中郡  
邑浮前浦波瀾動遠空襄陽好風日留醉與山翁

漢陽即事

唐儲光義

楚國千里遠孰知方寸違春遊歡有客夕寢賦無衣江  
水帶冰綠桃花隨雨飛九歌有深意捐珮乃言歸

五言排律

渡漢江

唐李百藥

東流既瀾瀾南紀信滔滔水激沈碑岸波駭弄珠臯  
含星映淺石浮蓋下奔濤溜濶霞光近川長曉氣高  
檣鳥轉輕翼戲鳥落風毛客心既多緒長歌且代勞

御定佩文齋詠物詩選卷九十

欽定四庫全書

御定佩文齋詠物詩選卷九十一

洛水類

四言古

洛水銘

漢  
李尤

洛出熊耳東流會集夏禹導疏經於洛邑元龜赤字漢  
符是立帝都通路建國南鄉萬乘終濟造舟為梁三都  
五州貢篚萬方廣視遠聽審任賢良元首昭明庶物是

康

五言律

渡洛水

唐太宗

春蒐馳駿骨總轡俯長河霞處流紫錦風前漾卷羅水  
花翻照樹堤蘭倒插波豈必汾陰曲秋雲發棹歌

詠洛

唐李嶠

九洛韶光媚三川物候新花明丹鳳浦日映玉雞津元  
禮期仙客陳王覩麗人神龜方錫瑞綠字佇來臻

奉和進船洛水應制

唐薛春感

禁園紆睿覽仙棹叶宸遊  
洛北風花樹江南彩畫舟  
榮生蘭蕙艸春入鳳凰樓  
興盡離宮暮煙光起夕流

歸渡洛水

唐皇甫冉

暝色赴春愁歸人南渡頭  
渚煙空翠合灘月碎光流  
漣浦饒芳草滄浪有釣舟  
誰知放歌客此意正悠悠

五言排律

奉和受圖溫洛應制

唐李嶠

七萃鑿興動千年瑞檢開文如龜負出圖似鳳啣來殷  
薦三神享明禋萬國陪周旂黃鳥集漢幄紫雲迴日暮  
鉤陳轉清歌上帝臺

奉和受圖溫洛應制

唐牛鳳及

八神承玉輦六羽警瑤谿戒道伊川北通津澗水西御  
圖開洛匱刻石與天齊瑞日波中上仙禽霧裏低微臣  
矯弱翮抃舞接鸞鷲

御定佩文齋咏物詩選卷九十一

欽定四庫全書

御定佩文齋詠物詩選卷九十二

湘水類

五言古

湘江舟中

明薛瑄

湛湛湘水綠夾岸叢篁多  
挽舟逆水上南風起微波  
嘉此晴宵景逍遙翫江沱  
沙渚曠緬邈雲岫紛嵯峨  
遠目為舒暢客意將如何  
濯纓吾所愛聊為扣舷歌

五言律

使還湘水

唐張九齡

歸舟宛何處正值楚江平  
夕逗煙村宿朝緣浦樹行  
子役已彌歲言旋今愜情  
鄉郊尚千里流目夏雲生

自湘水南行

張九齡

落日催行舫逶迤洲渚間  
雖云有物役乘此更休閒  
暝色生前浦清輝發近山  
中流澹容與唯愛鳥飛還

夜渡湘水

唐孟浩然

客行貪利涉暗裏渡湘川  
露氣聞芳杜歌聲識采蓮  
榜人投岼火漁子宿潭煙  
行侶時相問潯陽何處邊

夜入湘中

唐馬戴

洞庭人夜到孤棹入湘中  
露洗寒山遍波搖楚月空  
密林飛暗狖廣澤發鳴鴻  
行抵揚帆渚江分又不同

七言律

冬末同友人泛瀟湘

唐杜荀鶴

殘臘泛舟何處好  
寂多吟興是瀟湘  
就船買得魚偏美

踏雪沽來酒倍香  
猿到夜深啼嶽麓  
雁知春近別衡陽  
與君剝採江山景  
裁取新詩入帝鄉

五言絕句

泊湘口

唐戴叔倫

湘山千嶺樹桂水九秋波  
露重猿聲絕風清月色多

御定佩文齋詠物詩選卷九十二

欽定四庫全書

御定佩文齋詠物詩選卷九十三

湖類

五言古

車駕幸京口三月三日侍遊曲阿後湖作

宋顏延之

虞風載帝狩夏諺頌王遊春方動宸駕望幸傾五州山  
祇蹕嶠路水若警滄沅神御出瑤軫天儀降濠舟萬軸

金匱石室  
卷九十三  
肅行衛千翼泛飛浮雕雲麗璇蓋祥飈被彩旂江南進  
荆艷河激獻趙謳金練照海浦笳鼓震溟洲藐眄靚青  
崖衍漾觀綠疇民靈騫都野鱗翰聳淵丘德禮既普洽  
川嶽徧懷柔

南湖

梁簡文帝

南湖苻葉浮復有佳期遊銀綸翡翠鈎玉軸芙蓉舟荷  
香亂衣麝橈聲隨急流

治西湖

梁范雲

史氏導漳水西門溉河潮圖始未能悅克終良可要擁  
鋪勸年首提爵勞春朝平臯草色嫩通林鳥聲嬌已集  
故池鷺行蒔新田苗何吁畚築苦方歡魚稻饒

渡青草湖

陳陰鏗

洞庭春溜滿平湖錦帆張沅水桃花色湘流杜若香穴  
去茅山近江連巫峽長帶天澄迴碧映日動浮光行舟  
逗遠樹度鳥息危檣滔滔不可測一葦詎能航

秋日侍宴婁苑湖應詔

陳江總

翠渚還鑾輅，瑤池命羽觴。  
千門響雲蹕，四澤動榮光。  
玉軸昆池浪，金舟太液張。  
虹旗照島嶼，鳳蓋繞林塘。  
野靜重陰濶，淮秋水氣涼。  
霧開樓閣近，日迴煙波長。  
洛宴諒斯在，鎬飲詎能方。  
朽劣叨榮遇，簪笏奉周行。

彭蠡湖上

唐張九齡

沿涉經太湖，湖流多泱泱。  
凌晨趨北渚，逕浦已西日。  
所適雖淹曠，中流且閒逸。  
瑰詭良復多，感見乃非一。  
廬山直陽澣，孤石當陰術。  
一水雲際飛，數峰湖心出。  
象類何

交紉形言豈深悉且知皆自然高下無相恤

過彭蠡湖

唐李白

謝公入彭蠡因此遊松門余方窺石鏡兼得窮江源前  
賞迹可見後來道空存而欲繼風雅豈惟清心魂雲海  
方助興波濤何足論青嶂憶遙月綠蘿鳴愁猿水碧或  
可採金膏秘莫言予將振衣去羽化出巖煩

下潯陽城泛彭蠡寄黃判官李白

浪動灌嬰井潯陽江上風開帆入天鏡直向彭湖東落

景轉疎雨晴雲散遠空  
名山發佳興清賞亦何窮  
石鏡挂遙月香爐滅彩虹  
相思俱對此舉目與君同

與賈至舍人于龍興寺剪落梧桐枝望澗湖

李白

剪落青梧枝澗湖坐可窺  
雨洗秋山淨林光澹碧滋  
水間明鏡轉雲繞畫屏移  
千古風流事名賢共此時

宿鰕湖

李白

雞鳴發黃山暝投鰕湖宿  
白雨映寒山森森似銀竹  
提

攜採鉛客結荷水邊沐半夜四天開星河爛人目明晨  
大樓去岡隴多屈伏當與持斧翁前溪伐雲木

石魚湖上作

唐元結

吾愛石魚湖石魚在湖裏魚背有酒樽繞魚是湖水兒  
童作小舫載酒勝一杯座中令酒舫空去復滿來湖岾  
多歌石石下流寒泉醉中一盃漱快意無比馬金玉吾  
不須軒冕吾不愛且欲坐湖畔石魚長相對

初入太湖

唐陸龜蒙

東南具區雄天水合為一高帆大弓滿羿射爭箭疾時  
當暑雨後氣象仍鬱密乍如開雕笈聳翅忽飛出行將  
十洲近坐覺八極溢耳目駭鴻濛精神寒佶栗坑來斗  
呀豁湧處驚嵯岈嶮異拔龍湫喧如破蛟室斯須風妥  
帖若受命平秩微芒識端倪遠嶠疑格筆巉巖見銅關  
左右皆輔弼盤空儼相趨去勢猶橫逸嘗聞咸池氣下  
注作清質至今涵赤霄尚且浴白日又云構浮玉宛與  
崑閬匹肅為靈官家此事難致詰纔迎沙嶼好指願俄

已失山川互蔽虧，魚鳥空聳軋。何當授真檢，得召天吳  
術。一一問朝宗，方應可譚悉。

初入太湖

唐皮日休

聞有太湖名，十年未曾識。今朝得遊泛，大笑稱平昔。一  
舍行胥塘，盡日到震澤。三萬六千頃，頃頃玻璃色。連空  
淡無額，照野平絕隙。好放青翰舟，堪弄白玉笛。疎岑十  
十二，雙雙露矛戟。悠然嘯傲去，天上搖畫鷁。西風乍獵  
獵，驚波菴涵碧。倏忽雷陣吼，須臾玉崖折。樹動為蜃尾，

山浮似鰲脊落照射鴻溶清輝蕩拋捲雲輕似可染霞  
爛如堪摘漸暝無處泊挽泛從所適枕下聞彭次肌上  
生瘳瘵討異足遭迴尋幽多阻隔願風與良便吹入神  
仙宅甘將一蘊書永事嵩山伯

翠簾山天湖

明林鴻

翠簾高凌天峰麓曠且平何年此蟠龍遂成秋水泓呼  
吸納元氣溟濛變陰晴雲雷地中起日月波上生上有  
空僧巢巖棲煉神形寥寥水月觀洞見心胸明我昔凌

天梯恍若登赤城浮杯動松影發笑回天聲從茲便高  
舉永極雲霞情

太湖

明賀承

太湖何茫茫一望渺無極但見青蓮花嵯峨水中立仙  
人雙髻了弄影鏡光碧皎皎山月高船頭幾聲笛

七言古

雪中遊西湖

宋蘇軾

詞源灑灑波頭展清唱一聲巖谷滿未容雪積句先高

豈獨湖開心自遠  
雲山已作歌眉淺  
山下碧流青似眼  
尊前侑酒只新詩  
何異書魚餐蠹簡

七月三日至鄱陽湖

宋 王十朋

吾來鄱君山水州  
山水入眼常遲留  
絕境遙通雲錦洞

安仁縣有絕境亭雲錦水

清音下瞰琵琶洲

餘干縣有清音堂琵琶洲

於越亭前

晚風起湖入鄱陽  
三百里晚來一雨洗  
新秋身在江東

畫圖裡

五言律

和尹懋秋夜遊澗湖

唐張說

澗湖佳可遊，既近復能幽。  
林裏棲精舍，山間轉去舟。  
鴈飛江月冷，猿嘯野風秋。  
不是迷鄉客，尋竒處處留。

和尹懋秋夜遊澗湖

唐趙冬曦

政理常多暇，方舟此汴河。  
吹笙虛洞答，舉楫便風催。  
山暗雲猶辨，潭幽月稍來。  
清溪無數曲，未盡莫先迴。

臨洞庭

唐孟浩然

八月湖水平，涵虛混太清。  
氣蒸雲夢澤，波撼岳陽城。  
欲

濟無舟楫端居恥聖明坐觀垂釣者徒有羨魚情

秋夜遊澗湖

唐張均

遠水沈西日寒沙聚夜鷗平湖乘月滿飛棹接星流黃  
葉鳴悽吹蒼葭掃暗洲願移滄浦賞歸待潁川遊

過洞庭湖

唐杜甫

鮫室圍青草龍堆隱白沙護堤盤古木迎棹舞神鴉破  
浪南風正迴檣畏日斜湖光與天遠直欲犯仙槎

宿青草湖

杜甫

洞庭猶在目，青草續為名。  
宿槩依農事，郵籤報水程。  
寒水爭倚薄，雲月遞微明。  
湖鴈雙雙起，人來故北征。

題房公瑄漢州西湖

唐嚴公貺

鳳池才未盡，餘思鑿西湖。  
珍木羅修岼，水光映座隅。  
琴臺今寂寞，竹島尚縈紆。  
猶蘊濟川志，芳名終不渝。

題汧湖

唐許棠

偶得湖中趣，都忘隴坻愁。  
邊聲風下鴈，楚思浪移舟。  
靜極亭連寺，涼多島近樓。  
吟游終不厭，還似曲江頭。

過洞庭湖

許棠

驚波常不定半日鬢堪斑  
四顧疑無地中流忽有山  
鳥飛應畏隋帆遠却如閭  
漁父時相引行歌浩渺間

賦洞庭

唐僧可朋

周極八百里凝眸望則勞  
水涵天影濶山拔地形高  
賈客停非久漁翁轉幾遭  
颯然風起處又是鼓波濤

西湖閒望

宋梅堯臣

夏景已多趣湖邊日更佳  
園葵雜紅紫岼柳自歌斜  
雨

氣收林表城陰接水涯  
愛閒輸白鳥盡日立汀沙

寒食遊南湖

宋 蘇轍

繞郭春水滿被堤新柳黃  
官池無禁約野艇得飛揚  
浪泛歌聲遠花浮酒氣香  
晚風歸棹急細雨濕紅粧

鑑湖夜泛

宋 李 覲

明月到尊前擘舟古岬邊  
亂山斜入霧遠水倒垂天  
酒氣熏龍戲歌聲弄鶴眠  
迴頭嗤李郭此外更無仙

春日遊西湖

宋 王十朋

山色綠如染湖光青似磨峰高捧日久波濶浸天多瑞  
氣浮城闕春光醉綺羅能將比西子妙句有東坡

西湖夜泛

明 吳鼎芳

疎雨洗空翠來看湖上山斷橋芳草外小艇白鷗間月  
在美人遠春忙流水間西陵猶喚酒燈影出花關

西湖曉起

吳鼎芳

殘鐘湖上月杳杳落層岑曉色散為水秋聲聚作林間  
來曾不慣幽處每相尋叢桂南山下晴香一徑深

泛石湖同篠園居士

吳鼎芳

放棹秋光遠殘陽湖水西樹圍漁戶小山截寺門低野  
渡一僧立汀花數鳥啼且沽橋外酒同宿越來谿

西湖春遊

明盛鳴世

晴光上柳條結伴戲花朝歌近舟沿岸人開馬度橋雷  
峰看塔迴葛嶺弄泉遙日暮爭門入衣香滿路飄

彭蠡湖

明徐禎卿

茫茫彭蠡口隱隱鄱陽岑地涌三辰動江連九派深揚

金史口口口  
卷九十三  
船武昌客發興豫章吟不見垂綸叟煙波空我心

橫湖

明程本立

橫湖如匹練風景此中稀日暖赤鱗躍天晴白鳥飛寒  
松蟠石岸春水沒苔磯幾度斜陽晚漁舟渡口歸

湖興

明皇甫湊

客路浮清濟西風引汶川巖容搖浦岸水色淨湖煙旅  
鴈青山外殘虹綠樹邊滄浪棹謳發待枕月華眠

湖上

明李奎

錦帳開桃岸蘭橈繫柳津  
鳥歌如勸酒花笑欲留人  
鐘磬千山夕樓臺十里春  
回看香霧裏羅綺六橋新

五言排律

別澗湖

唐張說

念別澗湖去浮舟更一臨  
千峯出浪險萬木抱煙深  
南郡延恩渥東山戀宿心  
露花香欲醉時鳥轉餘音  
沙趣皆留賞無竒不遍尋  
莫言山水間幽意在鳴琴

和燕公別澗湖

唐趙冬曦

南湖美泉石君子玩幽竒灣澳陪臨泛巖岵共踐窺秋  
風頰桂竦春景綠楊垂郢客委分竹湘濱擁去麾枉帆  
懷勝賞留景惜差池水木且不棄情游良可知

自樂城赴永嘉枉路汎白湖寄松陽李少府

唐  
張子容

西行礙淺石北轉入谿橋樹色煙輕重湖光風動搖百  
花亂飛雪萬嶺疊青霄猿挂臨潭篠鷗迎出浦橈惟應  
賞心客茲路不言遙

與崔二十一遊鏡湖寄包賀二公

唐孟浩然

試覽鏡湖水中流見底清不知鱸魚味但識鷗鳥情帆  
得樵風送春逢穀雨晴將探夏禹穴稍背越王城府掾  
有包子文章推賀生滄浪醉後唱因此寄同聲

三月五日陪裴大夫泛長沙東湖

唐崔護

上已餘風景芳辰集遠坳綵舟浮浩蕩繡轂下娉婷林

樹迴蔥蒨笙歌入杳冥湖光迷翡翠草色醉蜻蜓鳥弄  
桐花日魚翻穀雨萍從今留勝會誰看畫蘭亭

陪幸西湖

元台哈布哈

北都冠蓋地西郭水雲鄉珠樹三花放鸞旗五色翔雞  
翹輝鳳渚豹尾殿龍驤駕擁千官仗帆開百尺檣屬車  
陪後乘清道肅前行河漢元通海湖山遠勝杭經綸屬  
姚宋制作從班揚瑞繞金根動聲搖玉佩鏘春陰飛土  
雨曉露挹天漿御柳枝枝綠仙葩處處香葵傾惟日向

荷偃借風張寶馬鳴沙路華舟迴石塘金吾分禁籞武  
衛四屯箱小大濡深澤仁明發正陽皇皇星斗潤落落  
股肱良朝野崇無逸邦家重有光賜祖寬下國傳詔出  
中堂布政親巡省觀民戒怠荒麥禾連野迴桑柘出林  
長樂歲天顏喜回鑾月下廊

七言律

春題湖上

唐  
白居易

湖上春來似畫圖亂峰圍繞水平鋪松排山面千重翠

月點波心一顆珠  
碧毯線頭抽  
早稻青羅裙  
帶展新蒲  
未能拋得杭州去  
一半勾留是此湖

南湖

唐  
溫庭筠

湖上微風入檻涼  
翻翻菱荇滿迴塘  
野船著岸偎春草  
水鳥帶波飛夕陽  
蘆葉有聲疑霧雨  
浪花無際似瀟湘  
飄然蓬艇東遊客  
盡日相看憶楚鄉

三堂東湖作

唐  
韋莊

滿塘秋水碧澄泓  
十畝菱花晚鏡清  
影動新橋橫蝨竦

岸鋪芳草睡鵝鵝蟾投夜魄當湖落岳倒秋蓮入浪生  
何處寂添詩客興黃昏煙雨亂蛙聲

祈雨曉過湖上

宋 歐陽修

清晨驅馬思悠然渺渺平湖碧玉田曉日未昇先起霧  
綠陰初合自生煙身閒始覺時光好春去猶餘物色妍  
更待四郊甘雨足相隨簫鼓樂豐年

西湖泛舟呈運使學士張揆

歐陽修

波光柳色碧溟濛曲渚斜橋畫舸通更遠更佳唯恐盡

漸深漸密似無窮綺羅香裏留佳客絃管聲來颺晚風  
半醉迴舟迷向背樓臺高下夕陽中

西湖

宋 林逋

混元神巧本無形匠出西湖作畫屏春水淨于僧眼碧  
晚山濃似佛頭青藥櫃粉堵搖魚影蘭杜煙叢閣鷺翎  
徃徃鳴榔與橫笛細風斜雨不堪聽

望太湖

宋 蘇舜欽

杳杳波濤閱古今四無邊際莫知深潤通曉月為清露

氣入霜天作暝陰  
笠澤鱸肥人鱸玉  
洞庭柑熟客分金  
風煙觸目相招引  
聊為停橈一楚吟

遊鑑湖

宋秦觀

畫舫珠簾出繚牆  
天風吹到芰荷鄉  
水光入座杯盤瑩  
花氣侵人笑語香  
翡翠側身窺綠酒  
蜻蜓偷眼避紅粧  
葡萄力緩單衣怯  
始信湖中五月涼

次張子京遊天王湖作

宋鄭俠

湖上遲遲不忍還  
談玄清徹幾重關  
旋風野馬皆歸靜

浙鳥潛魚各自閒  
隊果露巢秋後樹  
淡煙斜日晚來山  
吟情到此何終極  
注目紅雲紫霧間

沈虞卿秘監招遊西湖

宋楊萬里

蘇公堤遠柳生煙  
和靖園深竹映關  
船入芰荷香處去  
人從雲水國中還  
似寒如暖清和在  
欲雨翻晴頃刻間  
能為蓬萊老仙伯  
一杯痛快吸湖山

西湖圖

宋真山民

兩袖春風一丈池  
等閒踏破柳橋西  
雲開遠嶂碧千疊

雨過落花紅半谿青旂有情邀我醉黃鶯無恨為誰啼  
東城正在桃林外多少遊人逐馬蹄

錢塘湖

元馬祖常

石橋西畔竹棚斜閒日浮舟閱歲華金鑿懸崖開佛國  
玉分飛瀑過人家風杉鶴下春鳴埵雨樹猿啼暝蹋花  
欲賃芟田來此住東南更望赤城霞

過洞庭湖

元歐陽玄

白沙隱隱見金鼇殿閣憑虛結構牢天水渾融浮太極

神人幽顯隔秋毫  
龍堂深閼靈棲冷  
象緯低垂客枕高  
欲作廟堂迎送曲  
杜蘅碧盡離騷

次韻王侍郎遊湖

元薩都拉

綺席新涼舞袖偏  
賞心輸與使君專  
螺杯注酒搖紅浪  
綵扇題詩染綠煙  
一鏡湖光開曉日  
萬家花氣漲晴天  
湧金門外春如海  
畫舫笙歌步步仙

西湖

明王直

玉泉東匯浸平沙  
八月芙蓉尚有花  
曲島下通鮫女室

晴波深映梵王家常時鳧雁聞清唳舊日魚龍識翠華  
堤下連雲杭稻熟江南風物未宜誇

西湖遊覽

明田汝成

蘇堤如帶東湖心羅綺新粧照碧潯翠幕淺寒憐草色  
華筵小簇占花陰凌波人渡纖纖玉促柱箏翻疊疊金  
月出笙歌斂城市珠樓縹緲彩雲深

七言排律

泛太湖書事寄微之

唐白居易

煙渚雲帆處處通飄然舟似入虛空玉杯淺酌巡初匝  
金管徐吹曲未終黃夾纈林寒有葉碧琉璃水淨無風  
避旗飛鷺翩翩白鷺鼓跳魚拔刺紅澗雪壓多松偃蹇  
巖泉滴久石玲瓏書為故事留湖上吟作新詩寄浙東  
軍府威容從道盛江山氣色定知同報君一事君應羨  
五宿澄波皓月中

侯郎中新置西湖

唐方干

遠近利民因智力周迴潤物像心源菰蒲縱感生成惠

鱣鮪那知廣大恩  
激灩清輝吞半郭  
紫紆別派入遙村  
沙泉繞石通山脈  
岸水粘萍是浪痕  
已見澄來連鏡底  
兼知極處浸雲根  
波濤不起時方泰  
舟楫徐行日易昏  
煙霧未應藏島嶼  
鳧鷖亦解避旌幡  
雖云桃葉歌還醉  
却被荷花笑不言  
孤鶴必應思鳳沼  
凡魚豈合在龍門  
能將盛事添元化  
一夕機謨萬古存

五言絕句

陪侍郎叔遊洞庭醉後

唐  
李白

船上齊橈樂湖心泛月歸白鷗閒不去爭拂酒筵飛

陪從祖濟南太守泛鵲山湖 李白

湖濶數千里湖光搖碧山湖西正有月獨送李膺還

其二

水入北湖去舟從南浦回遙看鵲山轉却似送人來

歌湖 唐裴迪

空闊湖水廣青熒天色同艤舟一長嘯四面來清風

湖上夜飲 唐白居易

郭外迎人月湖邊醒酒風誰留使君飲紅燭在舟中

納湖

宋 朱子

詩筒連畫卷坐看復行吟想像南湖水秋來幾許深

虛湖曲

明 楊慎

留連非魚鳥溯洄豈蒹葭明月浴灑露青雲吸沆霞

七言絕句

同武平一員外遊湖

唐 儲光義

朝來仙閣聽絃歌暝入花亭見綺羅池邊命酒憐風月

金匱山房詩集卷之三  
浦口回船惜芰荷

其二

花潭竹嶼傍幽蹊畫楫浮空入夜谿  
芰荷覆水船難進  
歌舞留人月易低

湖上閒坐

唐白居易

藤花浪拂紫茸條菰葉風翻綠剪刀  
閒弄水芳生楚思  
時時合眼詠離騷

西湖戲作示同游者

宋歐陽修

子規聲在白雲中

清湖春早

元方回

樓上春陰覆曉雲  
一天河淨碧  
泫泫雨宜不驟  
風宜細  
閒倚闌干看水紋

湖上暮歸

元趙孟頫

春陰柳絮不能飛  
雨足蒲芽綠更肥  
正恐前呵驚白鷺  
獨騎款段遶湖歸

甓社湖

元袁桷

覽社湖中新水清風牽符帶引帆行靈妃夜渡霓裳冷  
輕折菱花翫月明

湖面

元范梈

湖面春深暖氣勻青蕪未隕已知春沙灣散駐張魚客  
蘆室時驚射雁人

石湖

明周砥

煙中白鶴獨飛還相伴孤雲盡日閒落日放船湖水上  
一簾秋色看青山

登城望鴛鴦湖

明懷悅

一上高城思不羣  
東風吹面洗餘醺  
紅船烏榜春湖上  
多載銀箏入暮雲



御定佩文齋詠物詩選卷九十三

欽定四庫全書

集部

御定佩文齋詠物詩選卷九十四至九

詳校官侍郎<sub>臣</sub>李封

主事銜<sub>臣</sub>徐以坤覆勘

總校官檢討<sub>臣</sub>何思鈞

校對官中書<sub>臣</sub>王瓚

謄錄監生<sub>臣</sub>汪兆鯤

欽定四庫全書

御定佩文齋詠物詩選卷九十四

川類

五言古

遊斜川

晉陶潛

開歲倏五日吾生行歸休念之動中懷及辰為茲遊氣  
和天惟澄班坐依遠流弱湍馳文魴閒谷矯鳴鷗迴澤  
散游目緬然睇曾丘雖微九重秀願瞻無匹儔提壺接

金史卷之五十三  
卷九十四  
賓侶引滿更獻酬未知從今去當復如此不中腸縱遙  
情忘彼千載憂且極今朝樂明日非所求

伊川獨遊

宋 歐陽修

東郊漸微綠驅馬忻獨往梅繁野渡晴泉落春山響身  
閒愛物外趣遠諧心賞歸路逐樵歌落日寒川上

五言律

聞所知遊樊川

唐 鄭 谷

誰無泉石趣朝下少同過貪勝覺程近愛閒經宿多片

沙留白鳥高木引青蘿醉把魚竿去殷勤藉岸莎

獨遊輞川

宋 蘇舜欽

行穿翠靄中絕磴落疎鐘數里踏亂石一川環碧峰暗  
林麋養角當路虎留蹤隱逸何曾見孤吟對古松

五言絕句

伊川泛舟

宋 歐陽修

春谿漸生溜演漾回舟小沙禽獨避人飛去青林杪

七言絕句

題稚川山水

唐  
戴叔倫

松下茅亭五月涼  
汀沙雲樹暗蒼蒼  
行人無限秋風思  
隔水青山似故鄉

御定佩文齋詠物詩選卷九十四

欽定四庫全書

御定佩文齋詠物詩選卷九十五

渚類

五言古

和徐都曹出新亭渚

齊謝朓

宛洛佳遊遊春色滿皇州  
結軫青郊路迴瞰蒼江流  
日華川上動風光草際浮  
桃李成蹊徑桑榆蔭道周  
東都已倣載言歸望綠疇

至牛渚憶魏少英

梁王僧孺

楓林暖似畫沙岸淨如掃空  
龍望懸石回斜見危島綠  
草閒遊蜂青葭集輕鵝徘徊洞初月浸  
滢瀆春潦非願  
歲物華徒用風光好

曉入宜都渚

唐閻寬

問俗周楚甸川行渺江潯興隨曉光發  
道會春言深回  
眺佳氣象遠懷得山林佇應舟楫用  
曷務歸閒心

五言律

後渚置酒

唐  
陳叔達

大渚初驚夜中流  
沸鼓聲寒沙滿曲浦  
夕霧上耶谿岸  
廣鳧飛急雲深鴈度低  
嚴關猶未遂此夕待晨雞

銅官渚守風

唐  
杜甫

不夜楚帆落避風  
湘渚間水耕先浸草  
春火更燒山早  
泊雲物晦逆行波  
浪慳飛來雙白鶴  
過去杳難攀

枉渚

元  
薛漢

枉渚倚孤棹  
意行隨杖藜  
鷗邊漁艇小  
牛後牧童低  
秋

色多因樹寒聲半是谿何當買茅屋此地卜幽棲

七言絕句

牛渚

唐  
胡曾

溫嶠南歸輟棹晨然犀牛渚照通津誰知萬丈洪流下  
更有朱衣躍馬人

竈渚

宋  
范成大

白魚出水卧銀刀紫筍堆盤脫錦袍捫腹將軍猶未快  
掉船西岸摘萋蒿

久巳口車公書

御定佩文齋詠物詩選

三

御定佩文齋詠物詩選卷九十五

欽定四庫全書

御定佩文齋詠物詩選卷九十六

浦類

五言古

入澗浦

梁簡文帝

泛水入迴塘空枝度日光竹垂懸掃浪鳧疑遠避檣

夕逗繁昌浦

梁劉孝綽

日入江風靜安波似未流岸迴知舳轉纜解覺船浮暮

煙生遠渚夕鳥赴前洲隔山聞戍鼓傍浦喧棹謳疑是  
辰陽宿于此逗孤舟

七言古

泊冷水浦

宋

楊萬里

前夕放船湘口步約到衡州來日午五程一減作三程  
謝渠江漲半篙清今日雨來三四五又閉疎篷聽暮雨  
長年商量泊舟所雨外青山更青處

五言律

晚投江澤浦即事呈柳兵曹

唐耿 漳

落日過重霞輕煙上遠沙移舟衝荇蔓轉浦入蘆花斷  
岸紆來客連波漾去槎故鄉何處在更道向天涯

滿浦

宋梅堯臣

馬頭攬岸斗燕尾泊船齊風送寒潮急雲藏晚日低逢  
人多楚語問客者吳雞難覓故臯宅蒹葭處處迷

五言絕句

秋浦歌

唐李 白

秋浦錦駝鳥人間天上稀  
山雞羞淥水不敢照毛衣

其二

愁作秋浦客強看秋浦花  
山川如剡縣風日似長沙

其三

桃波一步地了了語聲聞  
閣與山僧別低頭禮白雲

其四

邏人橫鳥道江祖出魚梁  
水急客舟疾山花拂面香

其五

水如一匹練此地即平天耐可乘明月看花上酒船

其六

淥水淨素月月明白鷺飛郎聽採菱女一道夜歌歸

其七

秋浦田舍翁採魚水中宿妻子張白鷗結罾映深竹

東浦夜泊

明謝績

日落潮生浦天空月上沙歸舟與飛鳥相趁入蘆花

七言絕句

浦中夜泊

唐白居易

閣上江隄還獨坐  
水風霜氣夜稜稜  
回看深浦停舟處  
蘆荻花中一點燈

過女兒浦

元鄭韶

浦口寒煙生白波  
蘆花風急棹舟過  
人家一路青山下  
只有秋田落鴈多

舟次橫浦

明僧德清

五雲一水入南安  
萬壘山迴六六灘  
行到水窮山盡處

梅花無數嶺頭看

御定佩文齋詠物詩選卷九十六

欽定四庫全書

御定佩文齋詠物詩選卷九十七

谿類

五言古

將遊湘水尋句谿

齊謝朓

既從陵陽釣挂鱗  
驂赤螭方尋桂水  
源謁帝蒼山垂辰  
哉且未會乘景弄  
清漪瑟汨瀉長淀  
潺湲赴兩岐輕蘋  
上靡靡雜石下離  
離寒草分花映戲  
鮪乘空移興以暮

秋月清霜落素枝  
魚鳥余方翫纓綏  
君自縻及茲暢懷  
抱山川長若斯

入若耶谿

梁王籍

舳舻何泛泛空水共悠悠  
陰霞生遠岫陽景逐迴流  
蟬噪林逾靜鳥鳴山更幽  
此地動歸念長年歎倦遊

入若耶谿

唐崔顥

輕舟去何疾已到雲林境  
起坐魚鳥間動搖山水影  
巖中響自答谿裏言彌靜  
事事令人幽停橈向餘景

姑孰谿

唐李白

愛此谿水閒乘流興無極漾楫怕鷗驚垂竿待魚食波  
翻曉霞影岸疊春山色何處浣紗人紅顏未相識

青谿

唐王維

言入黃花川每逐青谿水隨山將萬轉趨途無百里聲  
喧亂石中色靜深松裊漾漾泛菱荇澄澄映葭葦我心  
素已閒清川澹如此請畱盤石上垂釣將已矣

春泛若耶谿

唐綦毋潛

幽意遠無盡此去隨所偶晚風吹行舟花落入谿口際  
夜轉西壑隔山望南斗潭煙飛溶溶林月低向後生事  
且瀾漫願為持竿叟

泛若耶谿

唐丘為

結廬若耶裏左右若耶水無日不釣魚有時向城市谿  
中水流急渡口水流寬每得樵風便往來殊不難一川  
草長綠四時那得辨襖褐衣妻兒餘糧及雞犬日暮烏  
雀稀稚子呼牛歸住處無鄰里柴門獨掩扉

緱氏尉沈興宗置酒南谿

唐 王昌齡

林色與谿古深篁引幽翠山樽在漁舟棹月情已醉始  
窮清源口壑絕人境異春泉滴空崖萌草坼陰地久之  
風榛寂遠聞樵聲至海鴈時獨飛永然滄洲意古時青  
冥客滅跡淪一尉吾子躊躇心豈其紛埃事緱岑信所  
尅濟北余乃遂齊物可任今息肩理猶未卷舒形性表  
脫略賢哲議仲月期角巾飯僧嵩陽寺

尋東谿還湖中作

唐 劉昫虛

出山更回首日暮清谿深東嶺新別處數猿叫空林昔  
遊初有跡此路還獨尋幽興方在往歸懷復為今雲峰  
勞前意湖水成遠心望望已超越坐鳴舟中琴

月谿與幼遐君貺同遊

唐  
韋應物

岸篠覆迴谿迴谿曲如月沈沈水容淥寂寂鶯聲歇淺  
石方凌亂遊禽時出沒半雨夕陽霏緣源雜花發明晨  
重來此同心應已闕

和皇甫判官遊琅琊谿

唐  
孟郊

山中瑤璃境物外琅琊谿房廊逐巖壑道路隨高低碧  
瀨漱白石翠煙含青蛻客來暫遊踐意欲忘簪珪樹杪  
燈火夕雲端鐘梵齊時同雖可仰跡異難相攜唯當清  
宵夢髣髴願攀躋

奉陪侍中遊石筍谿

唐盧綸

朝日照靈山山谿浩紛錯圖秦無舊記紀禹應新鑿雙  
壁瀉天河一峰吐蓮萼潭心亂雪卷巖腹繁珠落彩蛤  
攢錦囊芳蘿媚花索援羣曝陽嶺龍穴腥陰壑靜得漁

者言閒聞洞仙博歌松倚朱幃廣石屯油幕國泰事留  
侯山春縱康樂間關殊狀烏爛熳無名藥欲驗少君方  
還吟大隱作旌幢不可駐古塞新沙漠

下牢谿

宋 歐陽脩

隔谷聞谿聲尋谿度橫嶺清流涵白石靜見千峰影巖  
花無時歇翠柏鬱何整安能戀潺湲俯仰弄雲景

宿樊谿

宋 張耒

黃州望樊山秀色如可鑿扁舟橫江來山脚繫吾纜大

川失洶湧淺水澄可攬北風吹疎雨夜枕舟屢撼齊安  
不可望滅沒孤城暗奔流略谿口龍脣屢窺瞰平生千  
金質戒懼敢忘暫茲遊定何名耿耿有餘念

泛舟西谿

元劉因

萬山倒滄浪一葉凌嵯峨嵯峨為飛舞翠影如婆娑輕  
陰散雨足淨綠生圓波人間碧海幻老眼青銅磨風雲  
幾千古辨此雨一蓑谿南有幽人鼓櫂前山阿煙深渺  
無處月色浮松蘿

自衢州至蘭谿

明 劉基

秋郊斂微雨，霽色澄人心。  
振策率廣路，逍遙散煩襟。  
疎煙帶平原，薄雲去高岑。  
湛湛水凝碧，離離稻垂金。  
薺麥霜始秀，元蟬寒更吟。  
幽懷耿虛寂，好景自相尋。  
心契清川流，目翫嘉樹林。  
歌傳滄浪調，曲繼白雪音。  
仙山在咫尺，早晚期登臨。

碧谿

明 顧璘

落落高梧陰，俯瞰寒流碧。  
微雲過疎雨，秋容澹無迹。  
魚

遊綠藻晴鳥下青蕪夕興至每垂綸歌罷還岸幘漁父  
兩三人時來共爭席

渡雙谿

明  
薛瑄

雙谿始合流崖緒遂經復洄潭一鏡平秋影空寒綠野  
渡得孤航山家帶喬木適意方自茲前呵戒童僕撫景  
重悠然誰能知斯曲

七言古

入少密谿

唐  
沈佺期

雲峰苔壁繞谿斜江路香風夾岸花樹密不言通鳥道  
雞鳴始覺有人家人家更在深巖口澗水周流宅前後  
游魚瞥瞥雙釣童伐木丁丁一樵叟自是避喧非避秦  
薜衣耕鑿帝堯人相畱且待雞黍熟夕卧深山蘿月春

說洄谿招退者

唐元結

長松亭亭滿四山山間乳竇流清泉洄谿正在此山裏  
乳水松膏常灌田松膏乳水田肥良稻苗如蒲米粒長  
糜色如珈玉液酒酒熟猶聞松節香谿邊老翁年幾許

長男頭白孫嫁女問言只食松田米無藥無方向人語  
浯谿石下多泉源盛暑大寒冬大溫屠蘇宜在水中石  
洄谿一曲自當門吾今欲作洄谿翁誰能住我舍西東  
勿憚山深與地僻羅浮尚有葛仙翁

卷畫谿行

宋 孫覲

老牯浮鼻水中歸綵雉應媒桑下飛蘿菀冥冥山四起  
數家雞犬煙樹裏一支新綠漲晴溝楊柳中間繫小舟  
卷畫谿頭烏鳥樂呼風喚雨不能休

其二

蝶趁花飛爭入坐倚空百尺游絲墮亂山銜日半船明  
斷雲載雨前邨過蕨芽戴土小兒拳漁市人歸柳貫鮮  
卷畫谿頭人語好烹魚煮蕨餉春田

其三

沙頭綠暗已藏鴉竹裏猶殘一兩花蝸廬抱柳開新國  
燕語窺簾憶舊家春風有信自年年卷畫谿邊柳繫船  
陶情滿酌酒如泉醉與長瓶藉草眠

其四

翠木蒼藤繚白沙，  
槿籬茅店野人家。  
了無狡兔營三窟，  
只有黃蜂趁兩衙。  
樹頭獵獵酒旗風，  
卷盡谿邊賣酒翁。  
銀瓶快瀉清若空，  
令君一笑面生紅。

曉泊蘭谿

宋 楊萬里

金華山高九天半，  
夜雪裝成珠玉案。  
蘭谿水清千頃強，  
朔風凍作瑠璃缸。  
日光雪光兩相射，  
老眼看來忘南北。  
恨身不如波上鷗，  
脚指為楫身為舟。  
恨身不如沙上鴈，

蘆花作家梅作伴折綿冰酒未是寒曉寒直欲冰我肝  
急閉箬篷擁爐去竹葉梨花十分注

餘不谿詞

元倪瓚

餘不谿水涵綠蕙微風吹波蹙龍鱗看山蕩槩不知遠  
兩岸桃花飛接人谿迴路轉松風急竹林華房霞氣濕  
忽逢道士頰而長疑是韓國張子房相期飄拂紫煙裏  
下攬滄溟浮玉觴

賦清谿

元郭鈺

清谿之水抱幽谷盤渦細浪相逐戲半篙晴日蕩金鱗  
一帶秋煙涵寒玉谿上仙翁絕塵俗開門俯谿飲谿綠  
白鳥飛來明鏡中垂楊鎖斷闌干曲窈窕春花亞脩竹  
脩竹何人共碁局紫蘿為蓋草為褥如輞川圖懸一幅  
嗟我早年厭羈束五湖風月醉心目祇今是處鯨波靜  
把釣從君事亦足

五言律

泛鏡湖南谿

唐  
宋之問

乘興入幽棲舟行日向低巖花候冬發谷鳥作春啼  
峯嶂開天小叢篁夾路迷猶聞可憐處更在若耶谿

酬萬八賀九雲門下歸谿中作

唐孫逖

晚從靈境出林壑曙雲飛稍覺清谿盡迴瞻畫刹微  
獨園餘興在孤棹宿心違更憶登攀處天香盈袖歸

終南東谿中作

唐岑參

谿水碧於草潺潺花底流沙平堪濯足石淺不勝舟  
洗

藥朝與暮釣魚春復秋興來從所適還欲向滄洲

武陵泛舟

唐孟浩然

武陵川路狹前棹入花林莫測幽源裏仙家信幾深水  
迴青嶂合雲渡綠谿陰坐聽閒猿嘯彌清塵外心

宿黑竈谿

唐張籍

夜到碧谿裏無人秋月明逢幽便移宿取伴亦探行花  
下紅泉色雲中乳鶴聲明朝記歸處石上自書名

白雲谿

唐吳鞏

山徑入幽篁，深林蔽日光。  
夏雲生嶂遠，瀑水引谿長。  
秀跡逢皆勝，清氛坐轉涼。  
回看玉樽夕，歸路賞難忘。

泛谿

唐 朱慶餘

曲渚迴花舫，生衣卧向風。  
鳥飛谿色裏，人語棹聲中。  
餘卉纔分影，新蒲自作叢。  
前灣更幽絕，雖淺去猶通。

泛谿

唐 項斯

谿船泛渺瀰，漸覺減炎輝。  
動水花連影，逢人鳥背飛。  
深猶見白石涼，好換生衣未。  
得多詩句終，須隔宿歸。

藍谿夜坐

唐張喬

藍水警塵夢夜吟開草堂月臨山靄薄松滴露花香詩  
外真風遠人間靜興長明朝訪禪侶更上翠微房

處州洞谿

唐方干

氣象四時清無人畫得成衆山寒壘翠兩派綠分聲坐  
月何曾夜聽松不似晴混元融結後便有此谿名

谿行即事

唐僧靈一

近夜山更碧入林谿轉清不知伏牛地潭洞何縱橫曲

岸煙初合平湖月未生孤舟屢失道但聽秋泉聲

送崔主簿赴睦州清谿

宋梅堯臣

舟輕不畏險逆上子陵灘七里峽天翠千重雲木寒古  
祠鳴野鳥亂石激春湍正與高懷愜寧歌行路難

宿蘭谿水驛前

宋楊萬里

繫纜蘭谿岸開襟柳驛窗人爭趨夜市月自落秋江燈  
火疎還密帆檣隻更雙平生經此縣今夕駐孤幢

其二

水色秋逾白山光夜不青一省畫天月萬粟種江星小  
酌居然醉當風不覺醒誰家教兒子清誦隔疎櫺

茗谿

元戴表元

六月茗谿路人言似若耶漁罾挂椶樹酒舫出荷花碧  
水千塍共青山一道斜人間無限事不厭是桑麻

谿上

明應亮

清谿流不極林際帶疎鐘鳥道連山屋灘聲落水春漲  
消新有岸雲起本多峰遙對猿啼峽鄉關煙樹重

南谿晚歸

明高啟

流水出雲根，遙通古寺門。  
山深僧少俗，人靜市如邨。  
馬渡知長淺，魚行見不渾。  
多情谿上月，歸路照黃昏。

谿上

高啟

秋色共谿長，遊人笑語涼。  
萍開天倒影，蓮墮水流香。  
魚鴈和星漉，禽翼帶雨張。  
從今搖桂棹，不必問瀟湘。

五言排律

奉酬韋祭酒自湯井還都經龍門北谿莊見贈

之作

唐張說

聞君湯井至，瀟灑憩郊林。  
拂曙攜清賞，披雲覲綠岑。  
歡言遊覽意，欵曲望歸心。  
是日期佳客，同山忽異尋。  
桃源花路轉，楊柳澗門深。  
泛舟伊水漲，繫馬香樹陰。  
繁絃弄水族，嬌吹狎沙禽。  
春滿河光媚，景斜嵐氣侵。  
懷仁殊未遠，重德匪專臨。  
來藻敷幽思，連詞報所欽。

和處州韋使君新開南谿

唐朱慶餘

地里光圖讖，樵人共說深。  
悠然想高躅，坐使變荒岑。  
疏

鑿因殊舊亭臺亦自今靜容猿暫下閒與鶴同尋轉旆  
馴禽起褰帷瀑瀉侵石稀潭見底嵐暗樹無陰躋險難  
通屐攀樓稱抱琴雲風開物意潭水識人心攜榼尋花  
遍移舟惜景沈世嫌山水僻誰伴謝公吟

西蜀淨衆寺松谿八韻兼寄崔處士

唐鄭谷

谿因松得名松吹答谿聲繚繞能穿寺幽竒不在城寒  
煙齋後散春雨夜中平染岸蒼苔古翹沙白鳥明澄分

僧影瘦光徹客心清帶梵侵雲響和鐘擊石鳴澹烹新  
茗爽暖泛落花輕此景吟難盡憑君畫入京

泛五雲谿

唐許渾

此谿何處路遙問紫髯翁佛廟千巖裏人家一島中魚  
傾荷葉露蟬噪柳林風急瀨鳴車軸微波漾釣筒石苔  
繁棹綠山果拂舟紅更就前谿宿邨橋與剡通

六言律

春日西谿即事

明僧道衍

雲斷山峰遠，遠樹迴谿路。斜斜酒旗風，颺邨店牛衣。日  
曬田家喚婦鳩，藏密竹引雛鴨聚圓沙。人晚棹歌歸去，  
爭先去折汀花。

其二

人家半依沙，背舟子長停岸。足楊柳三株五株桃花一  
簇兩簇斜陽澹澹牽黃遠水盈盈漲綠老翁忘却投綸  
因看晴鷗對浴。

七言律

題裴處士碧虛谿居

唐王建

鳥聲真似深山裏平地人間也不同春圃紫芹長卓卓  
暖泉青草一叢叢松臺前後花皆別竹崦高低水盡通  
細問來時從近遠谿名載入縣圖中

谿上行

唐溫庭筠

綠塘漾漾煙濛濛張翰此來情不窮雪羽襜褕立倒景  
金鱗潑刺跳晴空風翻荷葉一向白雨濕蓼花千穗紅  
心羨夕陽波上客片時歸夢釣船中

夜雪泛舟遊南谿

唐  
韋莊

大江西面小谿斜，入竹穿松似若耶。  
兩岸巖風吹玉樹，一灘明月曬銀砂。  
因尋野渡逢漁舍，更泊前灣上酒家。  
去去不知歸路遠，棹聲煙裏獨嘔啞。

酬張器判官泛谿

宋  
歐陽脩

園林初夏有清香，人意蕭閒味愈長。  
日暖魚跳波面靜，風輕鳥語樹陰涼。  
野亭飛蓋臨芳草，曲渚迴舟帶夕陽。  
所得平時為郡樂，况多佳客共銜觴。

沂谿

宋陸游

射的峰前禹廟東，短篷三扇卧衰翁。  
閒攜清聖濁賢酒，重試朝南暮北風。  
水落痕留紅蓼節，雨來聲滿綠蒲叢。  
衝煙莫作怱怱去，擬看谿丁下釣筒。

冷巖公柳谿

金劉中

斗印輕拋繫肘金，故園風物動歸心。  
柳含煙翠絲千尺，水寫天容玉一尋。  
山色只於閒裏好，風波不似向來深。  
人間桃李栽培滿，換得谿南十畝陰。

過五谿

元薩都拉

萬壑泉聲下五谿  
小涼天氣下谿時  
相逢橋上無非客  
行盡江南都是詩  
苦雨最嫌鳩喚急  
愛山不厭馬行遲  
幾時宿向華峰頂  
露月蕭蕭生桂枝

桃谿夜泊

明陸弼

清霜夜落武陵谿  
水上蒼煙十丈齊  
野爨冷燒紅葉火  
邨春寒接五更雞  
不眠枕上多新得  
所過山中有舊題  
起問昨宵沽酒處  
人家只在小橋西

谿上

明張泰

谿上閒行日未斜  
石橋南北見桃花  
避人魚入深深水  
傍母鳧眠淺淺沙  
渡口孤舟依野店  
磯頭一徑到漁家  
何時謝却塵中事  
來就田園學種瓜

五言絕句

谿上

唐顧况

採蓮谿上女  
舟小怯搖風  
驚起鴛鴦宿  
水雲撩亂紅

六言絕句

剡谿舟行

唐朱放

月在沃洲山上人歸剡縣谿邊  
漠漠黃花覆水時時白鷺驚船

七言絕句

桃花谿

唐張旭

隱隱飛橋隔野煙石磯西畔問漁船  
桃花盡日隨流水洞在清谿何處邊

蘭谿棹歌

唐戴叔倫

涼月如眉挂柳灣  
越中山水鏡中看  
蘭谿三日桃花雨  
半夜鯉魚來上灘

和韓吏部泛南谿

唐 賈島

谿裏晚從池岸出  
石泉秋急夜聲聞  
木蘭船共山人上  
月映渡頭零落雲

夜泊荆谿

唐 陳羽

小雪已晴蘆葉暗  
長波乍急鶴聲嘶  
孤舟一夜宿流水  
眼看山頭月落谿

池州清谿

唐杜牧

弄谿終日到黃昏  
照數秋來白髮根  
何物煩君千遍洗  
筆頭塵土漸無痕

谿興

唐杜荀鶴

山雨谿風捲釣絲  
瓦甌篷底獨斟時  
醉來睡著無人喚  
流下前灘也不知

若耶谿上

宋陸游

九月霜風吹客衣  
谿頭紅葉傍人飛  
邨場酒薄何妨醉

菰正堪烹蟹正肥

蘭谿舟中

元 薩都拉

水底霞天魚尾赤  
春波綠占白鷗汀  
越船一葉蘭谿上  
載得金華一半青

小谿

元 劉秉忠

小谿流水碧如油  
終日忘機羨白鷗  
兩岸桃花春色裏  
可能容箇釣魚舟

桃谿

明 魯鐸

世路悠悠已倦遊  
桃谿深處草堂幽  
東風自解幽人意  
不遣飛花逐水流

越來谿

明 葛一龍

草煙綠湊柳垂低  
橋對斜陽墮影西  
聽罷情歌聽啼鳥  
吳船搖過越來谿

荆谿

明 范 汭

亂水聲中繫艇斜  
月寒沽酒扣誰家  
仙源咫尺不知處  
紅葉吹來如落花

青谿

明  
沈明臣

窈窕青谿盡日尋  
雨收風歇翠沈沈  
一雙燕子翻花出  
始覺人家住隔林

御定佩文齋詠物詩選卷九十七